

PRAVILNIK
O VISINI I NAČINU ISPLATE JEDNOKRATNE NOVČANE POMOĆI PORODILJAMA

Član 1.

Ovim Pravilnikom regulišu se uslovi, način i postupak dodjele jednokratne novčane pomoći (u daljem tekstu: jednokratna pomoć) porodiljama koje imaju prebivalište/ boravište na području Općine Stari Grad Sarajevo (u daljem tekstu: Općina).

Član 2.

Pravo na jednokratnu pomoć, u smislu odredbi ovog Pravilnika, imaju porodilje koje:

- imaju prebivalište na području općine u trajanju od najmanje 9 (devet) mjeseci u kontinuitetu do dana poroda, odnosno rođenja djeteta;
- imaju boravište na području općine u trajanju od najmanje devet mjeseci do dana poroda, odnosno rođenja djeteta, a imaju priznat status raseljenog lica;
- imaju prebivalište / boravište na području općine kraće od devet mjeseci do dana poroda, odnosno rođenja djeteta, a stupile su u bračnu zajednicu sa licem koje ima prebivalište / boravište na području Općine u trajanju duže od 1 (jedne) godine.
- imaju prebivalište/boravište na području općine kraće od devet mjeseci do dana poroda, odnosno rođenja djeteta, ukoliko je došlo do prijevremenog poroda, a ispunile bi uslov iz stava 1. ovog Člana da je porod bio u planiranom terminu.

Član 3.

Visina jednokratne pomoći kao pomoć za novorođeno dijete iznosi 300,00 (tri stotine) KM za svako novorođeno dijete, a za svako treće i naredno novorođeno dijete iznos se uvećava za 50% ukoliko su ispunjeni uslovi iz člana 2. ovog Pravilnika

Član 4.

Visina jednokratne pomoći od 01.05.2023. godine iznosi 500,00 (pet stotina) KM za svako novorođeno dijete, a za svako treće i naredno novorođeno dijete iznos se uvećava za 50% ukoliko su ispunjeni uslovi iz člana 2. ovog Pravilnika. Jednokratna pomoć za porodilje kojima prvi ili drugi porod bude blizanački isplaćuje se naknada u iznosu od 1.500,00 KM.

Član 5.

Sredstva iz člana 3. i 4. ovog Pravilnika isplaćivat će se na tekući račun podnosioca zahtjeva putem Službe za privredu i finansije iz sredstava planiranih Budžetom Općine, stavka -Grant porodiljama Općine Stari Grad Sarajevo - **ekonomski kod 61410** - Grantovi drugim nivoima vlasti.

Član 6.

Pravo na naknadu propisanu ovim Pravilnikom ostvaruje se nakon podnesenog zahtjeva od strane porodilje ili njenog supruga sa potrebnom dokumentacijom kojom dokazuju to pravo u smislu Člana 2. ovog Pravilnika.

Porodilje koje su imale prijevremeni porod, čije pravo je definisano Članom 2., Stav 4., će svoje pravo dokazati uz predočenje zvanične medicinske dokumentacije kojom se dokazuje prijevremeni porod i planirani datum redovnog poroda, kao prilog zahtjevu.

Rok za podnošenje zahtjeva za ostvarivanje prava iz člana 2. ovog Pravilnika je 60 (šezdeset) dana od dana poroda odnosno rođenja djeteta.

Član 7.

Općinsko vijeće Stari Grad Sarajevo dužno je osigurati sredstva za provođenje ovog Pravilnika u Budžetu Općine Stari Grad Sarajevo.

Član 8.

Ovaj Pravilnik stupa na snagu osmog dana od dana objavljivanja u "Službenim novinama Kantona Sarajevo".

Član 9.

Stupanjem na snagu ovog Pravilnika prestaje važiti Pravilnik o visini i načinu isplate jednokratne novčane pomoći porodiljama ("Službene novine Kantona Sarajevo", broj 25/16).

**PREDSJEDAVAJUĆI
OPĆINSKOG VIJEĆA STARI GRAD
SARAJEVO**

Seid Škaljić

Općina Stari Grad Sarajevo
Općinsko vijeće

Na osnovu člana 8. i člana 8a. Poslovnika Općinskog vijeća Stari Grad Sarajevo („Službene novine Kantona Sarajevo“ broj: 19/21-Prečišćeni tekst i 15/22) podnosim

VIJEĆNIČKO PITANJE/INICIJATIVA

IME I PREZIME VIJEĆNIKA	Merima Arnautović
POLITIČKA PARTIJA	SDA
SJEDNICA OPĆINSKOG VIJEĆA	23. redovna sjednica
DATUM ODRŽAVANJA SJEDNICE	23.2.2023.
PITANJE ZA (navesti službu, sektor, odsjek, organ, nivo vlasti kojem je upućeno pitanje/inicijativa)	Služba za boračko-invalidsku i socijalnu zaštitu

TEKST PITANJA/INICIJATIVE	Podnosim inicijativu za izmjenu Pravilnika o visini i načinu isplate jednokratne novčane pomoći porodiljama („Službene novine KS“ 25/16), odnosno donošenje novog Pravilnika.
OBRAZLOŽENJE PITANJA/INICIJATIVE	<p>Od dana donošenja aktuelnog Pravilnika do danas znatno se izmijenio životni standard zbog povećanja potrošačkih cijena, te smatram da bi uvećanje jednokratne naknade majkama porodiljama bilo od velikog značaja.</p> <p>Naime, usvajanjem prijedloga novog Pravilnika došlo bi do povećanja osnovne jednokratne novčane naknade za 200,00 KM, za svako novorođeno dijete. To bi direktno uticalo i na povećanje naknade za svako treće i naredno dijete, obzirom da i prijedlog novog Pravilnika propisuje da se za te kategorije naknada uvećava za 50% u odnosu na osnovnu naknadu, kao što je propisano i aktuelnim Pravilnikom.</p> <p>Tako bi naknada za prvo dvoje novorođene djece iznosila po 500,00 KM, a za treće i svako naredno dijete po 750,00 KM.</p> <p>Novim prijedlogom Pravilnika definiše se i naknada majkama koje rode blizance, u slučaju da se radi o prvom ili drugom porodu, u iznosu od 1.500,00 KM. Također prijedlog Pravilnika predlaže skraćenje boravka roditelja djece na području općine Stari Grad prije rođenja djeteta, u</p>

cilju sticanja prava na naknadu, i definiše situaciju eventualnog prijevremenog poroda u odnosu na dužinu trajanja boravka roditelja na području općine.

Smatram da bi ovim izmjenama znatno stimulisali ostanak mladih u Općini Stari Grad, te bi na taj način stvorili predispozicije za demografsko podmlađivane Općine.

Kroz skraćivanje perioda boravišta, odnosno prebivališta na području Općine sa dosadašnjih godinu dana, na devet mjeseci, mišljenja sam da bi se privukao veći broj mladih bračnih parova da zasnuju porodicu na području Općine Stari Grad.

Također novim prijedlogom Pravilnika, spriječila bi se eventualna diskriminacija nad majkama koje su doživjele prijevremeni porod, a u suprotnom bi ispunjavale uslov za sticanje prava na jednokratnu novčanu pomoć.

U prilogu dostavljam prijedlog novog Pravilnika o visini i načinu isplate jednokratne novčane pomoći porodiljama.

Molim Vijeće da se izjasni o ovoj inicijativi.

Sredstva neophodna za isplatu na ime jednokratne pomoći porodiljama, obezbijediti kroz prvi rebalans budžeta za 2023. godinu, ne kasnije od aprila tekuće godine.

Potpis